

Headlines

1 प्रधानमंत्री नरेन्द्र मोदी होरें आखेआ ऐ जे भारत अन्नदाने दा सुददा उत्पादन करने आला मुल्ख ऐ ते कुल संसारी सतह पर खाद्य सुरक्षा ते विश्व खुराक सुरक्षा सरबंधी कन्नै च लग्गे दा ऐ।

2 जम्मू कश्मीर सरकार ने नशीले पद्धार्थे दे कारोबार ते आतंकवादिणं कन्ने सरबंध होने दे आरोप च 5 पुलस कर्मिणं सनें 6 अधिकारिणं गी बर्खास्त करी दित्ता ऐ।

3 प्रधानमंत्री हुंदे दफतरै च राज्यमंत्री डॉ. जितेन्द्र सिंह होरें आखेआ ऐ जे नशीले पद्धार्थे दा कारोबार, दुधारू पशुणं दी तस्करी ते गैर कनूनी तौरा पर दरयाएँ-खड्डे चा बजरी लेतर कड्डने आले कन्नै सख्ती नै पेश आया जाग।

4 पैरिस ओलंपिक च तीरंदाज दीपिका कुमारी महिलाएँ दे इक्कले इक्कले मकाबले दे क्वार्टर फाईनल च पुज्जी गई ऐ।

<><><><><><>

PM-Economist

प्रधानमंत्री नरेन्द्र मोदी होरें अज्ज आखेआ ऐ जे भारत अन्नदाने दा सुददा उत्पादन करने आला मुल्ख ऐ ते ओ कुल संसारी सतह दे खाद्य सुरक्षा ते विश्व खुराक सुरक्षा सरबंधी कम्मं च लग्गे दा ऐ। उनें आखेआ जे सरकार सुधारें दी मदद कन्ने राई-बाई दे क्षेत्र च मजबूती आहन्ना करदी ऐ ते इंदा उद्देश्य करसाने दे जीवन च सुधार आहन्ना ऐ। अज्ज नमीं दिलली च 32में अंतर्राष्ट्रीय कृषि अर्थ-शास्त्री सम्मेलन गी संबोधत करदे होई मोदी होरें आखेआ जे राई-बाई दा क्षेत्र सरकार दी आर्थिक नीति दा केन्द्र ऐ उनें आखेआ जे भारत मुट्टे अनाज, दुध, दालें ते मसालें दा दुनिया दा सब्बने शा बड्डा उत्पादक मुल्ख ऐ ते राई-बाई दे क्षेत्र च तकनीके दे इस्तेमाल कन्ने बड़ा मता सकारात्मक बदलाव दिक्खने गी लब्धा करदा ऐ जेहड़ा दिल बधाने आला ऐ

प्रधानमंत्री मोदी होरें देसै च राई-बाई दे क्षेत्र च तजुर्बे, अनुसंधान ते नमिणं तकनीके काहडें दे इस्तेमाल दा बी जिक्र कीता। उनें आखेआ जे मुल्खै च एल्लै राई-बाई दी शिक्षा देने आले 500 कोला मते कालेज न ते 700 कोला मते कृषि विज्ञान केन्द्र करसाने गी नमीं प्रौद्योगिकी दे बारे च सूचनां ते जानकारीयां उपलब्ध करा करदे न। उनें आखेआ जे पिछले 10 बरें दरान 9 लक्ख हेक्टर जिमीं गी सूक्ष्म सिंचाई दे दायरे हेठ आंदा गेआ ऐ। साढत्रे संवाददाता नै जानकारी दित्ती ऐ जे इस सम्मेलन च कोई 75 बक्ख-बक्ख मुल्खें थमां आए दे 1 जहार कोला मते प्रतिनिधि हिस्सा लै करदे न।

<><><><><><>

Rev Shah-Har Ghar Tiranga

केन्द्री गृहमंत्री अमित शाह होरें देशवासिणं गी अपील कीती ऐ जे “हर घर तिरंगा” अभियान दे तैहूत ओह 9 थमां 15 अगस्त तक्कर अपने घरे च तिरंगा फहरान। उनें लोकें गी तिरंगे कन्नै अपनी सैल्फी गी हर घर तिरंगा दी वैबसाईट harghartiranga.com उप्पर अपलोड करने लेई बी आखेआ। श्री शाह होरें आखेआ जे प्रधानमंत्री नरेन्द्र मोदी हुंदी “हर घर तिरंगा” मुहिम दऊं बरें च इक राष्ट्री आंदोलन च बदली गई ऐ। उनें एह बी आखेआ जे एह मुहिम भारतीयें च एकता गी जगाह करदी ऐ।

<><><><><><>

Official Saked

राष्ट्र विरोधी तत्वे दे प्रति अपनी जीरो टॉलरेंस नीति कन्नै चलदे होई जम्मू कश्मीर केन्द्र शासत प्रदेश दी सरकार नै अज्ज राष्ट्र बरोधी गतिविधिणं च शामिल 5 पुलस दे सिपाही ते इक अध्यापक सनें 6 कर्मचारिणं गी बर्खास्त करी दित्ता। अधिकारिणं मताबक बर्खास्त कीते गेदे कर्मचारी कनून प्रवर्तन ते खुफिया अजेसिणं दे नोटिस च आए ते उनेंगी आतंकवाद सरबंधी गतिविधिणं च शामिल पाया गेआ, जेहड़े राज्य दे हितें गी नुक्सान पंजादी ऐ। जिनेंगी बर्खास्त कीता गेआ ऐ उंदी पंछान सैफ दीन, सैलेक्शन ग्रेड कांस्टेबल दे तौरा पर होई ऐ ते जेहड़ा डोडा दे शिगानी भलेसा दा रौहने आला ऐ। जेहड़ा नारको टैरर फंडिंग दा आरोपी ऐ। फारुक अहमद शेख, हैड कांस्टेबल ते रहमत शाह, कांस्टेबल एह त्रऊं जनें करनाह दे रौहने आले न ते

एह त्रैनें एलओसी च नशा, थेआर ते पैहे दी तस्करी च शामिल हे। इरशाद अहमद चालकू, सैलेक्शन ग्रेड कांस्टेबल एह सिलिकोट उड़ी दा रौहने आला ऐ ते ओवर ग्राउंड वर्कर दे तौरा उप्पर कम्म करदा हा ते नजाम दीन जेहड़ा की इक सरकारी मास्टर हा, पुंछ जिले दे किरनी हवेली दा रौहने आला ऐ जेहड़ा हिज्बुल मुजाहिद्दीन आतंकी संगठन दे ओवर ग्राउंड वर्कर दे तौरा पर कम्म करदा हा, गी बी सेवाएं थमां हटाई दित्ता गेआ ऐ।

<><><><><><>

BSF-DG

एसएसबी दे डरैक्टर जनरल दलजीत सिंह चौधरी होर, नितिन अग्रवाल होरें गी समें कोला पैहले औहदे उप्परा हटाए जाने मगरा सीमा सुरक्षा बल दा अतिरिक्त प्रभार संभालगन। केरल कैडर दे 1989 बैच दे भारती पुलस सेवा दे अफसर अग्रवाल होरें गी शुक्रवारें बीएसएफ दे डीजी दे औहदे उप्परा हटाई दित्ता गेआ हा। शनिवारें गृहमंत्रालय आस्सेआ जारी कीते गेदे इक आर्डर च आखेआ गेआ ऐ जे उत्तर प्रदेश दे कैडर दे 1990 बैच दे आईपीएस अफसर दलजीत सिंह चौधरी होरें बीएसएफ दे डीजी दे औहदे दा अतिरिक्त प्रभार संभालगन। सरकार आस्सेआ बीएसएफ दे दऊं शीर्ष अफसरें गी हटाने दा एह फैसला भारत पाकिस्तान अंतर्राष्ट्रीय बन्ने कन्नै लगदे जम्मू क्षेत्र च लगातार आतंकी हमले गी दिखदे होई लैता गेआ ऐ, जेहदे च सेना ते सुरक्षा कर्मिणं सनें केई नागरिकें दी बी मौत होई गई ही।

<><><><><><>

Statehood

जम्मू च विरोधी धड़ें दिणं कोई इक दर्जन कोला मतिणं सियासी ते किश समाजी पार्टिणं दे संगठन “आल पार्टी युनाइटेड फ्रंट” नै जम्मू कश्मीर च विधानसभा चुनां करोआने कोला पैहले केन्द्र शासत प्रदेश गी एहदा राज्य दा दर्जा देने दी मंग गी लेइयै अज्ज प्रदर्शन कीता। प्रदर्शनकारिणं च कांग्रेस, नैशनल कांफ्रेंस, पीडीपी, मार्क्सवादी कम्युनिस्ट पार्टी ते शिव सेना दे केई वरिष्ठ लीडर बी शामिल हे। जेहड़े जम्मू प्रेस क्लब कश तवी दे पुलै पर बने दे महाराजा हरि सिंह जी हुंदी मूर्ति कश किट्ठे होए। उनें उपराज्यपाल होरें गी हाल च दित्ते गेदे मते इखेयारें गी वापस लैने दी बी मंग कीती। इस मौके प्रदेश कांग्रेस कमेटी दे वरिष्ठ उपप्रधान रविन्दर शर्मा होरें बीजेपी दी अगुवाई आली केन्द्र सरकार पर दोष लाया जे ओह इस डुग्गर राज्य दी शान कन्नै खिलवाड़ करै करदी ऐ ते जम्मू कश्मीर दे लोकें दी पंछान गी खत्म करने दी कोश्ट करे करदी ऐ।

<><><><><><>

Machail Yatra

45 जहार कोला मते श्रद्धालुणं जिला किशतवाड़ दे मनभानी पाड्डर घाटी च भगवती दुर्गा जिनेंगी मचेल माता आखेआ जंदा ऐ, दे पवित्र मंदर च दर्शन कीते। एह यात्रा पिछले म्हीने दी 25 तरीक गी शुरू होई ही। किशतवाड़ दे जिला प्रशासन नै यात्रा दी रमानदारी ते सुचारू ढंगे कन्नै चलने लेई सारे इंतजाम कीते दे न। तोआई 9 प्रोफेशनल फोटोग्राफरें दा ग्रुप “Thescape” दे बैनर हेठ किशवाड़दे पाड्डर च कब्बन घाटी दे Tupendeo Base Camp दे ट्रैक लेई निकली गेआ, इंदा मुख्क मकसद लैंडस्केप फोटोग्राफरें दे वैश्विक समुदाय गी इस क्षेत्रें दे आश्चर्यजनक लैंडस्केप ते मनभानी चोटिणं दा प्रदर्शन करना ऐ।

<><><><><><>

Jatinder Singh(byte)

प्रधानमंत्री हुंदे दफतरें च राज्यमंत्री डॉ. जितेन्द्र सिंह होरें अज्ज आखेआ ऐ जे जम्मू कश्मीर च नशीले पद्धार्थे दी तस्करी दुधारू पशुणं दी तस्करी करने आले ते गैर कनूनी तौरा पर नालें ते दरेयाणं चा लेतर बजरी कड्डने आलें खलाफ सख्त कारवाइ कीती जाग। ओह अज्ज कठुआ जिले दे जनता दरबार दरान लोकें दिणं दिक्कतें गी सुनांरदे हे.

<><><><><><>

Udhampur Food Poisoning

उधमपुर जिले दे घोरड़ी ब्लाक दे सत्यालता ग्रां च इक ब्याह दी धामै कथित बुस्सी दी रूट्टी खाने कारण बमार होने आले लोकें दी गिनतरी अज्ज 86 तोड़ी पुज्जी गई ऐ। जियां जे पैहले बी खबर दित्ती जाई चुकी दी ऐ जे इस घटना च दऊं बच्चें दी मौत होई चुकी दी ऐ। कल केई लोकें गी उल्टिणं ते दस्त दी शकैत दे बाद जिला अस्पताल उधमपुर दाखल कराया गेआ हा। आकाशवाणी दे उधमपुर आले जिला संवाददाता अचिन दूबे नै मैडिकल काजेल उधमपुर दे सुप्रीटेंडेंट संजय शर्मा हुंदे

हवाले कन्नै जानकारी दित्ती ऐ जे 35 नयाणें ते 51 बड्डे लोकें दा इलाज उत्थें चलै करदा ऐ। जबरदस्त दस्त दी शकैत आले 2 मरीजें गी जम्मू भेजी दित्ता गोआ ऐ। मकामी पुलसै मामला दर्ज करियै जांच शुरू करी दित्ती ऐ।

<><><><><><>

Organ Donation

अज्ज 14मां भारतीय अंगदान दिवस मनाया जा'रदा ऐ। इस मौके पर सेहत ते परोआर कल्याण मंत्रालय दे तैहत राष्ट्रीय अंगदान ते टिशू प्रत्यारोपण संगठन आस्सेआ अज्ज नमीं दिल्ली च अंगदान जागरूकता कार्यक्रम दा सरिस्ता कीता गोआ। इस मौके पर सेहत ते परोआर कल्याण राज्य मंत्री अनुप्रिया पटेल होरें उनें परोआरें गी सम्मानत कीता जिनें ब्रेन डेड घोशत होने दे बाद अपने परोआर दे जीएं दे अंगें दा दान कीता। मंत्री होरें आखेआ जे पिछले 10एं ब'रें च मुल्खै अंदर अंगदान करने दे मामले कोई 4 गुणा बधियै 18 ज्हार 378 तगर पुज्जी गे न। अनुप्रिया पटेल होरें इस उपलब्धि लेई डाक्टरें ते परोआर जनें दी बी सराहना कीती जेहूडे अपने धरै दे जीएं दे अंगदान लेई अगगे आए ते उनें सब्बनें लोकें दा बी आभार प्रगट कीता जेहूडे समाज च इस बारे जागरूकता पैदा करियै लोकें गी इस नेक कम्मै लेई प्रेरत करा करदे न।

<><><><><><>

Doda Blind Cricket(byte)

डोडा दे जिला विकास कमीशनर हरविंदर सिंह होरें अज्ज डोडा दे खेड्ड स्टेडियम च समाज कल्याण मैहकमे दी तरफा आयोजित नाबीना यानि दिक्खने च अक्षम नेत्रहीनें दी क्रिकेट प्रतियोगिता दा उद्घाटन कीता। इस प्रतियोगिता च जम्मू कश्मीर दे 8 बक्ख-बक्ख जिले थमां 28 खडारी हिस्सा लै करदे न। इस मौके आकाशवाणी कन्नै गल्ल करदे होई खडारिएं इस आयोजन पर अपनी खुश प्रगट कीती। इक खडारी मनप्रीत सिंह नै साढे जिला संवाददाता कन्नै गल्ल करदे होई आखेआ

डीसी होरें खडारिएं दी सिपत ते हौंसला अफजाई कीती जेहूडे शारीरिक चुनौतिएं दे बावजूद बी खेड्ड च शानदार प्रदर्शन करा करदे न।

<><><><><><>

Eve of Olympics Feats

पैरिस ओलंपिक च तीरंदाज दीपिका कुमारी नै महिला सेलैक्शन सिंगल्स एकल दे क्वार्टर फाइनल च थाहर बनाई लेई ऐ। दीपिका होरें एलीमीनेशन राउंड च शानदार प्रदर्शन करदे होई नीदरलैंड दी तीरंदाज Quinty Roeffen उप्पर 6-4 कन्नै जित्त हासल करी लेई। दूई बक्खी 25 मीटर एयर पिस्टल शूटिंग च मनु भाकर होरें अपने त्रीए तगमे जित्तने कोला खुंझी गेइयां ते उनेंगी इतेहासक दऊं कैह दे तगमें कन्नै गै संदोख करना पेआ। मुक्केबाजी च भारती खडारी निशांत देव होंदा मकाबला मर्दे दे 71 किलोग्राम वर्ग दे क्वार्टर फाइनल च मेक्सिको दे खडारी वरदे एवरेज दे कन्ने अज्ज रातीं होग। इस मकाबले च निशांत हुंदी जित्त कन्नै भारत दे इस ओलंपिक च जित्ते दे तगमे च इक होर इजाफा होई सकदा ऐ। गोल्फ च शुभांकर शर्मा ते गगनजीत भुल्लर होर त्रीए राउंड लेई कोशश करगंन।

<><><><><><>